

PRIZÒN YEN VENEZOLANO

Treinen di bich vòlibòl ku FKPD



E federashon di vòlibòl boneriano, BOVOBO, a realisá su promé dia di treinen di bich vòlibòl ku klientenan di Fundashon Kuido pa Personanan Desabilitá (FKPD). E treinen ta bou di guia di entrenadó John Kessel. Hopi dushi i bunita pa traha ku e muchanan di FKPD, preparando nan pa weganan di Special Olympis 2023.

**TA BUSKANDO
EMPLEADO**

PA REFORSA NOS
DEPARTAMENTU
DI TIRE CENTER



INFO AT EVE@NAPABONAIRE.COM

xerox™



**OBERSI
ELECTRONICS
BONAIRE**

CHANGAN AUTO



CS15

f /dabboussimotors



Talin Frans-Mercera a bai sosegá

KRALENDIJK – Atalin Frans-Mercera a fayerse na Kòrsou, na unda el a pasa mayoria aña di su bida. El a fayerse ku 89 aña di edat. E tabata biba den e barío Suffisant. Talin tabata un persona konosí den e barío i den e Rincon di ántes.

Atalin a nase den e parti nortwèst di Rincon. Su mama tabata Nicasia (Cachi) Mercera i su tata Remigio Martis.

Su mama a traha duru den su bida. El a traha hopi aña den kunuku di Dospos di Pedon St. Jago.

“Mi tata no a lanta na nos kas. Despues el a kasa ku Flora, pero semper bai a keda bishitá mi mama na kas”, segun Talin den e pro-

grama Herensia.

“Nos a lanta pover. Mi mama a traha duru. Tin dia ku mi no tabata mir’é mes. Tempran e tabata sali bai

traha. Pero hendenan tabata yuda otro.”

Bonaire.tv ta ripití e programa Herensia ku Talin e siman aki.



Tayer uso fondo Union Europeo

KRALENDIJK -- For di djamars 18 te ku djaweps 20 di aprel, algun delegado di tur seis isla di e parti karibense di Reino, ta partisipá na un tayer tokante fondonan di Union Europeo pa paisnan i teritorionan ultramar. E tayer akí tin komo meta pa logra ku e partinan karibense di Reino konhuntamente ta bai dirigí nan mes mas tantu biá i mas mihó, den direkshon di Union Europeo, relashoná ku posibel fondonan pa e islanan.

Durante e tayer ta traha riba un plan di aserkamentu tokante kon e islanan i Hulanda por dirigí nan mes konhuntamente den direkshon di Union Europeo, pa rekoudashon di fondo.

Presensia di Sekretario di Estado pa Relashon di Reino i Digitalisashon, Alexandra van Huffelen i Edison Rijna, komo enviado spesial di islanan BES pa fondonan di Union Europeo, fondonan di Nashonnan Uní i relashonnan ekonómiko ku Amérika Latino, ta suprayá importansia di e kolaborashon akí. Djamars tabata e promé dia di e anterior gezaghebber den e ròl akí.

Sekretario di Estado van Huffelen: “Tantu na Union Europeo komo na Nashonnan Uní, tin hopi posibilitat i oportunidat pa Karibe Hulandes, Boneiru, Saba i Sint Eustatius. Pensa por ehèmpel riba utilisashon di supsidio i eksplorashon di e posibilitatnan ku fondonan di Union Europeo, e fondonan na Nashonnan Uní, pero tambe paisnan di Amérika Latino, ta ofresé na Karibe Hulandes. Pa hasi uso di e oportunidatnan akí, tin mester di prinsipalmente tempu i kapasidat pa edificá un bon ret.”

Ku e enviado spesial, Edison Rijna, ku sin ningun duda ta trese e eksperensia i ekspertisio korekto i e resultado konhunto for di e tayer, a pone un bon base pa konhuntamente hasi mihó uso i den un forma mas efektivu di e posibilitatnan ku tin, segun van Huffelen.

E enviado spesial, Rijna, a agregá: “A base di mi ròl komo enviado spesial pa islanan BES, mi por habri posibilitatnan nobo pa kolaborashon i desaroyo internashonal. Pa motibu di nos relashon ku Union Europeo tin hopi oportunidat pa hasi uso di dje. P’esei e tayer

akí ta un paso importante pa e islanan i Hulanda konhuntamente dirigí nan mes mas tantu biá i mas mihó, den direkshon di Union Europeo. Mi ta anhelá pa wak

e resultadonan di e tayer akí i mi ta inklui nan den e plannan pa dunamentu di kontenido mas aleu na mi funshon.”

Durante e tayer, e re-

presentashon permanente di Hulanda na Bruselas, e ofisina regional di Union Europeo na Guyana i Union Oropéa na Bruselas mes, tambe a duna presentashon.



Rijkdienst Caribisch Nederland

VAKATURA

Bo tambe ke traha pa RCN?
Bo por solisitá pa e siguiente funshonnan:

SSO - Kolaboradó Servisio di Asuntu Fasilitario
Werkgeverschap - Hurista Sèniòr
Voogdijraad - Asesor Legal

Mas informashon?
Bishitá www.rijksdienstcn.com/vakatura

PRIZÒN YEN VENEZOLANO

KRALENDIJK- Instituto Hudisial Hulanda Karibense (JICN) tin un grupo grandi di detenido di orígen venezolano. Ta trata aki di un total di 21 hòMBER ku wardakosta a interseptá riba laman gan-chu ku basta kilo di droga. Den promé kuartal di e aña aki, Korte den Promé Instansia a kondená e hòmbèrnan na kastigu inkondishonal. E hòmbèrnan aki lo keda enkarselá pa un periodo ku ta varia entre 4 pa 8 aña. Lògikamente e kastigu pisá tin

ku komo meta pa kastigá e hòmbèrnan pero alabes pa atvertí i spanta kualke otro malechor ku mesun intension.

Awor tin indikashon ku e grupo di detenido aki ta preshoná e kapasidat di prizòn, mirando ku tin lugá pa 113 detenido. JICN ta splika ku esaki no ta kuadra ku práktika. “Na e momentu aki den JICN tin 93 detenido, inkluso e 21 venezolanonan. Pues tin sufisiente kapasidat ainda”, bosero di JICN Anette van der Houwen a

splika.

Segun nos fuentenan, hustisia ta trata na aliviá e situashon pa medio di saka detenidonan bou di supervishon elektróniko, pues ku banchi. Òf duna esaki komo kastigu. Ministerio Públiko (OM) rondamente ta desmentí esaki. “Ora ta evaluá un kaso, kapasidat di JICN no ta hunga un ròl. Ademas, un kondénado ta bin na remarke pa un banchi ora e tipo di kastigu aki ta kuadra mas kuné enbes di un kastigu di prizòn”,

Roderick Gouverneur a bisa. E ta bosero di OM.

Mirando ku ta trata aki di detenidonan indokumentá, sigur ta e solushon si por laga nan sinta nan kastigu na nan pais, den e kaso aki na Venezuela. “Den teoria ta posibel, pero den práktika ta hopi difisil pa ehikutá”, segun Gouverneur.

Tambe tin e opshon pa repartí de grupo di detenido aki ku otro islanan den Reino. “Pa basta tempu kaba ta traha huntu ku e diferente paisnan den Reino pa loke ta trata ehekushon di kastigunan di prizòn. Aparte di esei, e preshon riba kapasidat di detenshon di Kòrsou, Aruba i St. Maarten ta mas grandi ku na Boneiru i na

islanan BES”, segun OM.

JICN ta agregá ku awor nan ta konstruyendo un ala adishonal pa detenshon di estranhero. “E ampliamente aki ta oumentá e kapasidat total ku 24.”

Mester menshoná ku despues di e pandemia di Covid trafikashon di droga a oumentá. “Aña pasá Marina Real huntu ku wardakosta di Merka i Karibe a interseptá 35 mil kilo di droga den awanan di Karibe. Na aña 2020 i 2021 a gara 9 mil kilo di droga”, Marinka Vos, bosero di Ministerio di Defensa a splika BONERIANO. Mayoria bia ta trata di kokaina i de bes en kuando mariwana. E droganan aki ta sali for di paisnan di Suramérica.



Pinta bo karikatura bou di Plasa

Pa algun dia kaba tin un karikaturista ta pinta, riba petishon, karikatura bou di Plasa. Si bo ke un karikatura por akudí serka e persona aki.



Ecua Bon Construction B.V.

ta buska

- **1 metselaar (albañil)**
- **1 especialista de cerámica (steenbewerker)**

Mas inf. tel. nr. **782-2903**

GRADISIMENTSU I INVITASHON

Kasá, yunan, nietunan, rumannan i demas famia di

Robert John Dirksz

mihó konosi komo Robbie Arubiano



kier a gradisi un i tur pa e sosten i kompañò durante su bida i despedida, tambe un danki spesial na Dr. Eysinga i Dr. Schwengle ku tabata tey pé tur momentu.

Nos ta invitá na un santu sakrifisio di misa pa sosiegu eterno di alma di Robbie, **djaweps 20 april pa 7.30 anochi na parokia di Coromoto na Antriol.**

Aseptá esaki komo un invitashon personal.

Siña di bo historia, kultura
i naturalesa



TELBO kanal 70 Flamingo TV kanal 23

‘Bon Biní Bonaire’ ku edishon nobo riba merkado

KRALENDIJK – Djaluna e edishon di primavera di Bon Biní Bonaire a sali. E revista, un edishon di gabinete di gezaghèber, tin komo meta pa informá relashonnan di Entidat Públiko Boneiru pafó di nos isla tokante de-

saroyonan aktual. Den e edishon nobo, for di diferente punto di bista ta dediká atenshon na e konsekuensianan di kambio di klima pa Boneiru. Por ehèmpel dijkgraaf Pieper ku huntu ku un tim di eksperto a hasi vários rekomendashon pa

mehorashon di maneho di awa, i direktor Palmen di Greenpeace Hulanda ta bini na palabra. E organisashon di naturalesa i medio ambiente ta preparando un kaso den korte pa imponé ku ministerionan ta hasi mas kos pa yuda Boneiru protehá su mes kontra subida di superfisie di laman.

Ta tira lus riba e tema siguridat den entrevista ku hefe di Kuerpo Polisial Hulanda Karibense sr. Braaf i kwartiermaker i alabes hefe interino di e Sentro di Informashon Regional i Ekspertisio Hulanda Karibense sr Van Hees. Mas aleu empresarionan lokal ta konta kon nan a hasi un komienso eksitoso ku yudansa di e dunadó di mikrokredito Qredits i den un kontribushon komo wéspet e ekonomista Van Buiren ta yama Boneiru un djamanta ku ta kresiendo. Ta duna atenshon tambe na modernisashon di Aeropuerto Flamingo, bishita di trabou di gobernantenan i ‘Leerorkest Bonaire’.

A reservá e kurason di e

revista pa un impreshon kolorido di potrèt di e bishita ku Rei Willem-Alexander, Reina Máxima i prinsesa heredero Amalia a hasi na Boneiru. Bou di e título ‘E último’ gezaghèber Rijna den e prólogo ta papia tokante su despedida pa motibu di su nombrashon komo

enviado spesial pa Hulanda Karibense pa fondonan di Union Oropeo, fondonan di Nashonnan Uní i relashonnan ekonómiko ku Amerika Latino.

Por download e edishon di primavera di Bon Biní Bonaire via: www.bonairegov.com

Bon Bini Bonaire
Nederlands zonnigste gemeente

Koninklijke gasten warm onthaald

• Nijpels kwartiermaker Klimaattafel • Stroom van de zon • Focus op waterbeheer • Greenpeace in de bres • Groeibriljant van de Caribische regio • Succesvol dankzij Qredits • Trots op politiekorps

19 di April 2023
“... angel di Señor a habri porta di prizòn i liberá e apòstelnan ...”
(cf Ech 5,19)

Miéntas forsanan di skuridat ta trata di tapa e lus di Kristu, Señor ta obra maravia den bida di esnan ku risistí maldat i konfia den e poder salvífiko di Kristu. Outoridat a enkarselá e apòstelnan, pero angel di Señor, a liberá nan “... ku porta di prizòn duru será i ku tur e wardadónan ta vigilá na nan puesto.” (cf Ech 5,23)

Algu milagroso ...!
Esei ta nos fe kristian!
“Loke ta imposibel pa hende ta posibel pa Dios!”
(cf Lukas 18,27) P’esei djis sigui konfia i biba un bida ankrá riba e Baranka di nos salbashon.
“Mal tempu lo presentá, pero e kas di nos bida lo keda para firme.” (cf Mateo 7,25)

Danki Señor, ... nos baranka, nos eskudo, nos fortaleza, ..., nos salbashon.”
(cf Salmo 91)

1L Ech 5,17-26; Salmo 34,2-9; Ev. Huan 3,16-21

005999-522-4056 Un Snehil Pan unsnehilpan

Reflekshon DIOS SU PAS, UN SÒLDÁ NA WARDA

“I e pas di Dios, ku ta surpasá tur komprehensiu, lo warda boso kurason i boso mente den Cristo Jesus”. Filipensenan 4:7(BS)

Mainta na momento ku e yamada a drenta for di hòspital pa mi hasi un biopsia, mi a konfundí un tiki i naturalmente mi fundeshi a sakudí. Señor Bo ke mi bolbe pasa dor di henter e proseso un bes mas? Esei a ‘flits’ mesora den mi mente. I esei ta lógiko pa pensa, pasobra ta masha hopi kos mi a pasa aden.

Ma no a dura hopi ku e Pas di Dios a invadí mi kurason i mi mente.

Anto mi a kòrda un splikashon tokante di e versíkulo di awe. “E pas di Dios ta warda nos kurason i nos mente”. Einan na griego, e palabra ‘warda’ ker men: protehá pa un Guardia militar pa prevení invashon di e enemigu. Wow, ki mihó protekshon pa mi mente i mi kurason.

Asina mi a skohe pa laga e Pas di Dios mes, para Guardia komo e Mihó Sòldá, pa kuida mi mente i mi kurason for di pensamentunan negativo ku e enemigu di mi alma por trese.

I el a duna resultado. Mi tin e pas di Dios meimei di momentonan atverso, pasobra mi a skohe pa kere Dios i Su Palabra. Mi no sa kiko lo bini, pero mi sa Ken ta huntu ku mi, mi Señor i mi Dios.

Kisas awe bo tin un mente trubel, un mente konfundí, anshá òf un mente ku ta akusá bo. Mi ta animá bo pa buska e Pas di Dios. E promé stap ta invitá Hesus komo Salbador i Señor di bo bida. Einan bo ta risibí Pas ku Dios. I despues bo por disfrutá di e Pas di Dios.

E sòldá di Dios komo guardia ke protehá bo kurason awe!

Miralda Paula-Frans

Produkshon PGM



Programanan di Bonaire.tv

TELBO kanal 70
Flamingo TV kanal 23

Djárason 19 april 2023

12.00 Herensia:	Jan Jonkman
13.00 Aki Boneiru:	Plantashi Onima
14.00 Herensia:	Apertura Den Stashi
15.00 BAPA:	Elvis i Sur Magda
16.00 Herensia Aruba:	Madonna Stephens
17.00 Aki Boneiru:	Echo
18.00 Herensia:	Beatrix Leopolda Martina-Goeloe
19.00 BAPA:	Benito Rafael Rodriquez
20.00 Aktualidat:	Drecha kas
21.00 Aki Boneiru:	Dia di Den Gobi, Rincon 2018
22.00 Herensia:	Anton Burtleson
23.00 BAPA:	Charles (Chal) Pikeur

Tur mèrdia 12’or ta kuminsá un programashon nobo di 4 ora.
E programashon aki ta ripití pa 24:00.



HUSTISIA

Hòmber no mester sinta kastigu kologá

KRALENDIJK- E hòmber Jurandy A. (40) tin un kastigu di prizòn di 60 dia kologá riba su kabes i mester a presentá dilanti hues pa atendé ku esaki. Djárason 12 di aprel Korte den Promé Instansia a atendé e petishon di Ministerio Públiko (OM) pa ehekutá e kastigu kondishonal di A. Korte a disidí ku e no mes-

ter sinta esaki.

Jurandy a risibí un kon- dena mará na un kastigu di trabou i un periodo di prue- ba di 1 aña. Si e no kumpli ku e kastigu di trabou e mester bai prizòn pa 60 dia. Riba 13 di dezèmber 2022 Reclassering a manda un rapòrt pidiendo pa prolongá e periodo di prueba ya asina Jurandy por kaba ku e kas-

tigu di trabou.

No a atendé esaki i for- malmente 11 di febrüari úl- timo su periodo di prueba a kaba sin ku el a kumpli ku su kastigu di trabou. “Pa lei te ku 3 luna despues por pidi prolongashon di e peri- odo di prueba”, fiskal mr. Agelink a splika.

Jurandy a splika Korte ku ya el a kumpli ku henter

e kastigu di trabou i ta Re- classering ainda no a pone OM na haltura.

“Miéntas tantu 4 luna a pasa. Awor mi ke bin ku un solushon práktiko”, hues a bisa. El a proponé pa pro- longá e periodo di prueba ku un aña. “Sigur ta un solushon práktiko. Pero ai- nda e mester sigui guia na MHC i sigui treinen Kas

Sigur”, fiskal a reakshoná.

“Mi a hasi tur kos kaba”, Jurandy a kontestá.

“Awèl bon. Nos ta pro- longá e periodo di prueba i duna Reclassering chèns pa informá OM tokante e ehekushon di bo kastigu”, hues a bisa.

“Bon, pero ora mi kaba aki mi ta bai na Reclasse- ring si”, Jurandy a bisa.

Tráfiko sigur pa nos tur

KRALENDIJK- Hues i fiskal ta keda en- fatísá ku kada usuario di nos kareteranan ta re- sponsabel pa un tráfiko sigur. Durante tratamen- tu di kasonan di tráfiko den Korte, kada bia fiskal ta splika ku shofùnnan ta

monstra un aktitut den trá- fiko ku ta kontra lei. Entre otro kore outo bou di in- fluensia di alkohòl ta keda un problema den tráfiko. Esaki por trese kuné situ- ashonnan desastroso.

Ta klaro ku outoridat tin sero toleransia pa ku

manehá un vehíkulo bou di influensia di alkohòl. Sin duda ta retené reibe- weis si un shofùr ta fuma. No opstante esaki, ainda por nota basta persona ku mester responsabilisá nan mes dilanti Hues. Un shofùr por tèst maksimal

220 mikrogram di alkohòl den su sistema sin risibí sanshon. Tur loke ta riba esaki ta kastigabel pa lei.

Velosidat

Un aspekto suma- mente peligroso ta kore outo muchu duru. La- mentablemente por nota e kondukta iresponsabel aki riba karetera. Remarkabel ta ku na Boneiru prakti- kamente no por kore outo duru. E velosidat mák- simo permití pa vehíku- lonan di motor den área urbanisá ta 40 kilometer pa ora. Pafó di áreanan urbanisá por kore te un máksimo di 60 kilometer pa ora.

Transportá hende den baki

Transportá hende den baki di pikòp ta kontra Lei di Tráfiko. Pero no ta tur hende ta na haltura ku ta prohibí pa transportá

hende den baki di pikòp. E baki di un pikòp no ta un asiento i ademas no tin faha di seguridat. Pues e no ta trahá pa transportá persona. Den artíkulo 24 insiso 1 di Lei di Tráfiko esaki ta regulá. Parse ku ta nos kustumber pa transportá hende den baki di pikòp. Kuantu bia nos no ta mira riba djadum- ingu un pikòp ku baki yen mucha, rumbo pa laman? Ademas, vários kompania di konstrukshon ta trans- portá nan trahadónan den baki di pikòp.

Segun nos infor- mashon e grupo di trabou Seguridat den Tráfiko ke pone mas atenshon riba konsientisashon i infor- mashon pa ku e topiko di tráfiko. E grupo di trabou aki ta konsistí di partisi- pantenan di OM, Entidat Públiko Boneiru (EPB) i Kuerpo Polisial Hulanda Karibense (KPCN).



Wardadó di prezu riba nònaktif

KRALENDIJK- Mando di prizòn a pone dos wardadó di prezu riba nònaktif riba sospecho di trese opheto di kontrabanda den e instituto. “E dunadó di trabou ta hasiendo un investigashon pa ku esaki”,

bosero di JICN a bisa.

Ya ta konosí ku a konfiská 15 telefòn selular di detenidonan den prizòn. Despues di esaki a deskubrí un konekshon entre e kontrabanda i algun wardadó di prezu.

BONERIANO anteriormente a bati bèl tokante e situashon fèrfelu den JICN. Nos fuente hopi yega na e instituto di korekshon a spièrta kaba riba e peliger aki. “Mester tene kuenta ku ta un funshon duru i asta

peligroso. Si bo no paga hende manera mester ta, bo por keda straño si nan kai den tentashon?”, nos fuente a kuestioná.

BONERIANO tin indikashon ku ta trata di wardadónan di prezu di Sentro

di Detenshon i Korekshon Kòrsou (SDKK) ku a bin pa reforsá e tim di JICN.

“No keda straño si mas kos lo sali na kla”, nos fuente a advertí.

Eksposishon na Terramar Museum: 'Honor na oséano'

KRALENDIJK -- Na un manera festivo tin un apertura di e eksposishon 'Honor na oséano' na Terramar Museum dia 28 di

aprel di 5'or di atardi pa 8'or di anochi.

Disfrutando di muzik di Hòfi Kultural i huntu ku diferente organisashon

di naturalesa i artista lokal, ta presentá e relashon históriko i íntimo entre Boneiru ku oséano.

E eksposishon ta konsistí di arte trahá di material resiklá, arte di glas i serámiko, un eksposishon di informashon ku artefaktonan manera

kaska di turtuga i wega edukativo i informativo.

Ta papia tokante e manera kon hende ta dependé di awa i e konekshon entre hende ku awa na Boneiru ku Mangrove Maniacs,

Sea Turtle Conservation Bonaire, Green Peace, MoltenWolf Glass, Nukua Pottery,

Sharking Daily, Hòfi Kultural, FuHiKuBo i Jong Bonaire.

A base di e kòmbersashonnan akí, kada organisashon a diseñá mane-

ranan kreativo pa komuniká tokante e relashon fuerte di Boneiru ku oséano i kon nos bienestar i salú ta dependé di oséano.

'Honor na oséano' ta e di dos eksposishon di Terramar Museum i Wereld Natuur Fonds. E eksposishon ta parti di e programa ku un durashon di dos aña

'Boneiru Bibu: Bou di Awa'. E programa 'Boneiru Bibu: Bou di Awa' ta eksistí pa rekordá nos e beyesa di oséano i e bida marino, kon importante e ta pa nos bienestar i sobrevivensia i e ta urgi nos pa protehá oséano mas mihó. Por bishitá e eksposishon di 28 di aprel pa 17 di yùni.



Mensaje de la Virgen Maria Reina de La Paz desde Medjugorje 25 de MARZO de 2023

"Queridos hijos! que este tiempo sea para vosotros un tiempo de oración".

¡Gracias por haber respondido mi llamado!" 03/25



Vacature Automonteur bij AB Car Rental

Functie omschrijving:

- Je zorgt voor reparaties en onderhoud aan onze verhuurauto's;
- Je geeft opvolging aan storingsmeldingen
- verricht leuke banden service;
- Je verzorgt periodiek de 24-uurs storingsdienst
- Je zorgt er voor dat onze verhuurvloot er altijd netjes bij staat.

Functie eisen:

- Je hebt MBO niveau algemene auto techniek of minimaal 3 jaar ervaring in een vergelijkbare functie.
- Je hebt ervaring met het onderhouden van automotoren (o.a. Wingle en JAC motoren)
- Je beschikt over rijbewijs B.
- Je spreekt Nederlands, Papiamentu en/of Spaans.

Wat bieden wij jou?

- Een 40 urige werkweek
- Passend salaris bij functie.

Je sollicitatiebrief voorzien van C.V. die je **vóór 28 April 2023** te richten aan naar **fom@abcarrental.com**
Voor vragen kun je bellen naar **frontoffice manager van ABCarrental +599 717-8980**. Meer informatie over ons vind je op **www.abcarrental.com**



Jan Jonkman den Herensia

Morto di Ilse a dal Domi duru

KRALENDIJK – Den pasado Jonkman ta den Domi Jan Jonkman ta den e programa Herensia ku ta estrená awe na Bonaire.tv.

Den pasado Jonkman tabata den Herensia kaba. Fin di siman Jonkman tabata na Boneiru despues di hopi

tempu pa presentá un buki nobo i a grab'é pa Herensia.

Loke ta kore manera un liña kòrá den e programa aki ta Ilse, esposa di Jan Jonkman, kende a fayesé na kuminsamentu di aña pasá.

“Morto di mi Poppy tabata un sla duru pa mi. Mi no kier a biba mas. Mi a baha 15 kilo, pero mi a haña forsa i bida nobo, te ku mi por a bula bini Boneiru”, domi Jonkman a bisa.

Den Herensia entrante awe mèrdia 12'or i e tres dianan aki ku diferente ripitishon por skucha e storia di domi Jonkman.



DEN PASONAN DI BÒI

E rúbrika aki no ta kos di tur dia den **BONERIANO**. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den salimentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ritishon.

Un dje kualidatnan pa bo pone korant bende ta di usa un tiki sensashon. M'a siña esaki hopi bon serka fundadó di Extra Eddy Oleana. Te awe, anke mi no ta skirbi masha mas pa korant, mi ta kòrda su lèsnan. Especialmente e artíkulo prinsipal mester kapta atenshon di e lesadó. E kabes mester ta yamativo, asta kisas un tiki sensashonal. No tin nada malu den 'sensashonal', dependé kon bo mir'é.

Den kombersashon e si-man aki Nathaly, miembro di redakshon di **BONERIANO**, a rekordá mi riba un kabes ku m'a traha pa un artíkulo tokante kaimentu di gobièrnu na Aruba. M'a lubidá mes. Ta mi ta enkargá ku buska i selekshoná notisia pa e sekshon arubiano den **BONERIANO**. Mi a disidí di hasi e artíkulo ei esun prinsipal di **BONERIANO**. Na grandi

riba 'frontpage': "GOBIERNU A KAI!" **BONERIANO** a bende manera pan kayente e dia ei. Mi no a hasi nada malu. Mi no a engańá hende, tampoko skirbi algu ku no ta bèrdat. Gobièrnu a kai. Pero di Aruba. No gobièrnu di Boneiru. Mi no a skirbi esei tampoko.

Ayera tambe m'a publiká un artíkulo tokante un kabritu ku tabata pará den forma 'misterioso' lat anochi na porta di RBC Bank. Mi a referí na un hòmer ku a bai lanta sèn na bank-omátiko, a mira e kabritu i a kore limpi bai ku su outo. Kasi tur kos skirbí ta bèrdat. Loke mi no a skirbi ta ku e hòmer en kestion tabata mi mes. E kabritu a hala mi atenshon i mi a saka su foto. Pues mi no a kore bai. M'a saka sèn trankil i despues kore bai (ku outo). Mi sa ku e artíkulo ei a hala atenshon di nos lesadónan. Tin biá

mester duna un artíkulo un tiki sous, sin atentá masha riba bèrdat.

Papi tambe a lanta un tiki den e skol di Eddy Oleana ku mi aki. Siman pasá el a pone un artíkulo riba portada tokante e echo ku un pareha a kome e piská djindja i a fayesé. E kabes di e artíkulo a sugerí ku lo ta na Boneiru esaki a sosodé. Tabata den eksterior. E no a gańa i nos no a gańa. Eddy Oleana tabata mi maestro den e tipo di kosnan aki. Lástima el a muri muchu tempran.

Na mas ku un okashon m'a yega di publiká ku mi ta bai stòp di duna e kurso di historia i kultura ku mi ta dunando pa kasi 20 ańa kaba pa **FuHiKuBo**. Pero kada bes ta bini hende ta bisa ku ta pidi pa hasié un biá mas pa nan bini. P'esei mi a disidí di hasié atrobe. Pa duna esnan ku ainda no a sigui'é un chèn mas. Awor sí mi ta kere ku lo ta pa último biá. Lo mi por sigui hasié, pero riba petishon pa grupo òf kompanianan. Paso-bra esei tambe sa sosodé.

Mi ta bai sigui duna kurso di historia, pero awor tratando otro tópiko. Tópikonan ku no a bini dilanti den e

promé kurso aki. Ademas mi ke bai mas profundo den tópikonan ku mi ta trata den e promé kurso. Tin tema ku ta eksigí mas profundisashon. Den e kurso nobo ku lo bai kuminsá despues ku esun aki kaba, lo mi bai atendé tambe hopi di naturalesa i geologia. No mester lubidá ku Emma Pratt, mi man drechi último tempu aki na **FuHiKuBo**, ta un biólogo spesialisá den geologia. E lo bai trata esaki huntu ku mi. Emma ta partner di Danielson mi yu. Mi mester atmití ku si Emma no a bini, masha dia lo mi a tira sèrbètè den rin.




Siman pasá Mary Thielman tabata di bishita serka nos na **FuHiKuBo. E ta hefe di e loke nos ta yama **Post & Archief** di Saba. Nos a papia basta riba Saba. Na e okashon ei m'a dun'é algun 'memory-stick' ku programanan ku nos a graba na e isla ei atraves di añanan. Famia di e personanan ei, ku mayoria a muri, por tuma kontakto ku Mary pa hańa kopia.**

MONCHI & TONCHI

Tonchi, ta di bèrdat Bonè ta yen. Ata awó nan di prizòn tambe ta yen di venezolano

Awèl si, aki poko dia e ta bai yena mas. Ta hopi ta bin balia `remailo` djis aki. Djo para den ..



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòi Antoin
786-6818
Aviso
avisobon@gmail.com

Francisco: “Hipokresia ta lenga di esnan korupto”

Papa atvertí pa e di dos dia konsekutibo kontra korupshon

“Ku nos lenguahe sea evangéliko, simpel, laga nos papia ku bèrdat i amor”

Francisco a bisa den siman ei ku **hipokresia ta lenga di esnan korupto** i ku un berdadero kristian no ta usa un lenguahe “sosialmente eduká”, sino ku e ta papia di manera simpel, ku amor, “ku e mesun **transparen-sia ku e muchanan**, ku no ta hipókrita pasobra nan no ta korupto”.

E pontífise a hasi e manifestashon aki durante e misa ku el a selebrá den e kapia di e **residencia de Santa Marta**, kaminda e ta biba, den kua e ta

referí na e esena evangéliko di e tributo na César i di e petishon di e fariseonan na Kristu tokante legitimidat di e tributo aki.

Francisco a señalá ku e intenshon di esnan ku tabata aserká Hesus, esnan korupto, tabata di lag’é kai den trampa.

“**Ku palabra suave, bunita, demasiado dushi nan ta purba na presentá nan mes komo amigu, pero tur kos ta falsu**, ya ku e hendenan aki no ta stima e bèrdat, únikamente nan mes, i nan ta purba na gañá, na impliká e otro den

nan mentira. **Nan tin un kurason mentiroso i no por bisa e bèrdat**”, e pontífise a suprayá, ku ta insistí den ku e lenguahe di esnan korupto ta hipokresia.

Papa Bergoglio a afirmá ku hipokresia no ta e lenguahe di bèrdat, ya ku esaki “hamas ta bai su so, semper e ta bai ku amor”.

“**No tin bèrdat sin amor**”, e Obispu di Roma a sigurá, kende a atvertí ku e lenguahe “ku ta kombensi” ta hiba bo na “eror, na mentira”.

E di 266 susesor di san Pedro a manifestá ku e humildat ku Hesus ke di su disipelnan “no tin nada di aber ku e trasterianan, ku e moda masha dushi aki di bai padilanti”.

Humildat —el a aña— ta “simpel, e ta manera esun di un mucha, ku no ta hipókrita, pasobra e no ta korupto”.

Francisco a atvertí kristiannan tokante vanidat i a bisa ku maske “nos ta gusta ku nan bisa kos bunita di nos”, tin ku tene masha kuidou, “**ya ku esnan korupto sa esaki i ku e lenguahe aki nan ta purba na debilitá nos**”.

Papa a pidi e fielnan pa nan pensa bon kua lenguahe nan gusta usa i si nan ta papia ku amor “o ku e lenguahe sosial aki ku kua nan ta bisa kosnan bunita pero ku nos no ta sinti”.

“**Ku nos lenguahe sea evangéliko**. E hipókritanan ta kuminsá ku trasteria, i ta kaba akusando esnan ku hasi



BAI I PREDIKA
E
BON NOTISIA!

MARKO 16,15

Pastoral Hubenil Korsou ta invita bo na:

**PASKU
HUBENIL**

Dia: Djasabra, 29 April 2023
Orario: 8:30 - 16:30
Lokashon: JCC i Parokia Gr. Kwartier
Edat: 11 - 20 aña
Kontribushon: 25 NAF pa hóben



Produkto i buki pa detòks pia ku High Tech Massage gratis!

Detòks pia ta yuda e kurpa saka tòksiko for di e igra, ta boost bo energia, ta reduzi pèshi, ta reduzi insomio i ta lagá bo lusí mihó.

Nos produktonan pa Detòks pia ta hasi uso di e mekanismo i prinsipio científico di osmosis via bo planta di pia pa protehá bo mes kontra di infekshon.

Bo ta risibí e buki Detòks na balor di Naf. 50,00 i un pakete di 10 saku di produkto pa detòks pia durante 21 dia ku ta kosta Naf. 120,00 i bo ta paga Naf. 153,00 i risibí un High Tech Massage gratis aserka.

Ku kada pago bo tin derecho riba un karchi di deskuento ku un balor di Naf. 25,00

Pasa na Piramid Top Wellness Center; Menegrandeweg 2, huki Rio Canarioweg, of yama pa mas informashon Tel. 869-7733 of app. 520-8544

Selebrashon di Fiesta di Dios su Mizerikòrdia

Pa opservá e Fiesta di Dios su Mizerikòrdia, nos mester:

- 1.- **Selebrá** e Fiesta riba e djadumingu despues di Pasku di Resurekshon.
- 2.- **Arepentí nos** sinseramente di tur nos pikánan.
- 3.- **Konfia** por kompletu den Hesus.
- 4.- **Konfesá** preferiblemente promé ku e djadumingu aki.
- 5.- Risibí **Santa Komunion** riba dia di e Fiesta.
- 6.- **Venerá** (hasi un akto òf demostrashon di profundo respèt religioso pa kuné dor di persona kende e ta representá, den e kaso aki nos Señor Hesukristu) e Imágen di Divino Mizerikòrdia.
- 7.- Ser **mizerikordioso** ku otronan atraves di nos akshonnan, palabranan i orashonnan na nòmber di nan.

Deseo

Señor a bisa Sùr Faustina: *Durante e nuebe dianan akí hiba e almanan na e fuente di mi mizerikòrdia pa nan saka forsa, alivio i tur grasia ku nan mester pa konfrontá e difikultatnan di bida i specialmente na ora di morto. Kada dia lo bo trese na mi Kurason un grupo diferente di almanan i lo bo baha nan den e laman aki di mi mizerikòrdia. I lo mi introdusí tur e almanan aki den kas di mi Tata (...) Kada dia lo bo pidi mi Tata grasia pa e almanan aki dor di mi pashon amargo.*

masha trastu. Laga nos pidi Señor ku nos lenguahe sea simpel, ku nos ta papia manera muchanan, manera yunan di Dios, ku bèrdat i amor”, el a afirmá.

Esaki ta e di dos bia den dos dia ku papa Francisco ta referí na esnan korupto.

Djaluna, den e misa ku el a selebrá tambe den e residencia di Santa Marta el a afirmá ku esnan korupto ta “**e anti-**

kristu”, nan ta hasi hopi daño na Iglesia i nan ta “un peliger, ya ku nan ta adoradónan di nan mes, nan ta pensa únikamente riba nan mes i nan ta konsiderá ku nan no tin mester di Dios”.

For di dia ku e papa aki papa, e argentino Jorge Mario Bergoglio tur dia ta selebrá misa den e kapia di e residencia di Santa Marta, na ku ta asistí personal di Santa Sede o personalidatnan ku ta bishitá Vatikanu.



**KONSERTO
KOR**
Guadalupeana

**KOMEHEIN NO TIN “VAKANTIE”
YUDA NOS KABA KU NAN !!**

FUNDRAISING PAROKIA BRIEVENGAT

PAROKIA DI **BRIEVENGAT**
22 APRIL / NAFL. 35,-

Boneiru i EZK ta traha huntu

Koperashon pa sumministrashon di energia

KRALENDIJK -- di Ministerio di Asuntunan Ekonómiko i Klima, bishitá Boneiru pa diskutí desaroyonan riba tereno di suministro di energia.



Durante su bishita, el a papia ku Gezaghebber Edison Rijna i miembronan di Kolegio Ehekutivo, Hennyson Thielman i Jolinda Craane, tokante e nesesidat di un almase-namentu sigur di kombustibel i ekspanshon di energia duradero.

Un tópiko importante di e diskushon, tabata e konstrukshon di tanki nobo pa almasená kombustibel i garantisá un depósito seif. E tankinan aktual no ta kumpli mas


ku reglanan i leinan. Ta konstruí e tankinan nobo sùit di aeropuerto, pa por abastesé via e waf eksistente.

Paralelo ku e konstrukshon di e tankinan nesesario pa almasená kombustibel, ta trahando riba ekspanshon di energia duradero.

Keijzer-Baldé a bishitá e tereno di Contour Global na e parti nòrt di Boneiru, unda aktualmente ta konstruí un parke solar nobo. Apart for di panelnan pa generá energia, ta bini tambe un parke di bateria pa almasená e energia akí. Por sperá ku e parke solar nobo ta kuminsá funshoná na luna di septèmber di e aña akí.


Ademas a diskutí e plan pa ekspanshon i renobashon di e parke aktual. E invershon pa e depósito nobo di kombustibel ta den man di Bonaire Brandstof Terminals (BBT), establese dor di Ministerio di EZK. Via BBT tambe ta invertí den e parke solar nobo i e parke mas grandi pa futuro.

Gezaghebber Rijna ta kontentu ku e atenshon ku ta duna pa e desaroyo riba tereno di suministro di energia pa Boneiru. Tur partido ta wak e importancia di ekspanshon i desaroyo di energia duradero pa Boneiru, specialmente mirando e kresementu di poblashon i e kresiente demanda pa energia.



KOOYMAN

WELCOME



10% DISCOUNT STOREWIDE

PRE-RINCON DAY CELEBRATION

VALID ON APRIL 29TH, 2023 ONLY

*Does not apply to arctic airco's, kitchen cabinets, current specials, special orders, volume discounts, cement, lumber & board, rebar, welded mesh, roofing sheets aluminum & vinyl doors and windows. Cash & Carry only!

Pa info i komunikado den
Extra/BONERIANO
Redakshon: extra-bon@gmail.com
Aviso mail: aviso-bon@gmail.com

Flor di Orkidia a selebrá Luna di Kultura

KRALENDIJK -- Fundashon 60 plùs Flor di Orkidia a selebrá dia 17 di aprel Luna di Kultura. E anochi akí a bai dediká na miembronan Yùfrou Bertha Martis, Lilo Welvaart, yu di un miembro di direktiva i tambe na Siso Silberie, di kua ruman i kasá ta miembro di e grupo.

Un anochi agradabel kaminda tur miembro a bini

ku nan trahe di folklórico, pa kua Fundashon 60 plùs Flor di Orkidia ta super orguyoso.

Carol Ann Soliano a duna un demonstrashon kon pa mara lensu i despues a skucha serka Izain Mercera un tiki di nos kultura boneriano. Un anochi fruktifero, kaminda tur hende a gosa un bòl. Danki na kada un ku a koperá di un òf otro

manera.

Miembronan Swinda a kushiná un sukulento bakiou, Sula ku su tremendo salada di bakiou, Enid ku su repanan di pampuna i maishi chikí, Ezy ku a traha e kuki pa bebe ku chukulati pinda. Danki na Ida, p'esei tambe por último Chepita, kende a dòrna asina nechi. Hopi bunita i tur hende a gosa un bòl.



www.islandfinancebonaire.com





E MIHÓ OPSHON NA MOMENTU KU BO MESTER DI SÈN!

Apliká awe mes

Kaya Almirante Pedro Luis Brion #7,
Kralendijk 717-5991



*SUHETO NA APROBASHON DI KRÉDITO I VERIFIKASHON DI DOKUMENTO.

Suministrashon di 10 megawatt di energia durabel

Parke solar mas grandi di Karibe Hulandes

KRALENDIJK — Na Boneiru a duna inisio na ponementu di e parke solar mas grandi di Karibe Hulandes. E parke ta bini riba un tereno di 5.5 hèktar grandi na Kaminda Turístiko, banda di e instalashon di e produktor di energia, Contour Global Bonaire. Green World Company (TGWC) di Sneek, Friesland, ku a realisá ya mas proyekto riba e tereno di energia du-

radero na Karibe Hulandes, ta ehekutá e proyekto.

E preparashon a dura un seis aña asina. Banda di haña un lokalidat adekuá, naturalmente mester a sigui tambe e proseduranan di pèrmit. Aparte di pèrmit di konstrukshon, tabatin mester tambe por ehèmpel un pèrmit pa kap palu. P'esei tambe e organisashon di naturalesa STINAPA, tabata enbolbí, segun direktor di

TGWC, Fedde Pronk.

Supsidio

E parke ta bai konsistí di 10.816 panel solar ku na tur ta suministrá 10 megawatt di elektrisidat, di kua segun kalkulashon por suministrá sinku mil kas ku koriente.

Fin di aña pasá a kuminsá ku limpia e tereno. Entretantu a transportá e materialnan nesensario. “E luna akí nos ta kuminsá instalá e

panelnan solar. Nos ke entregá e proyekto promé ku fin di verano. Banda di spesialisimo for di entre otro Hulanda, Portugal i Kòrsou, mas òf ménos mitar di e forsa laboral ta lokal,” segun Pronk.

Dunadó di enkargo ta produktor di elektrisidat Contour Global, ku ta tambe doño di e parke di mulina. Bonaire Brandstof Terminals BV (BBT), un partisipashon di estado instituí dor di e minister di asuntunan ekonómiko, ta ko-finansiadó. Pa esaki Minister Jetten a pone 10 mion euro disponibel na e empresa ku intenshon enfátiko pa invertí esaki den durabilidad i redukshon di tarifa di uso.

E kontribushon di EZK ta keda usá tambe pa kompra di un parke di bateria grandi pa oumentá siguri-

dat di suministro.

Mulina di bientu

Contour Global, BBT i gobièrnu lokal ta tambe den kombersashon tokante renobashon i ampliashon di e parke di mulina eksistente ku ta yegando su durashon di bida. Den kombinashon ku e parke solar, aworó por suministrá un 80 porshento asina di energia renobabel.

E distribushon di koriente ta keda den man di e kompania lokal di gobièrnu, WEB. A lanta BBT pa sigurá suministro seif di kombustibel. Pa esaki ta konstruyendo dos tanki nobo na aeropuerto. Riba urgimentu di Tweede Kamer, e empresa a haña tambe enkargo pa ta aktivo tambe na durabilidad di suministrashon di energia.



Asina tantu espasio tin mester pa 10.816 panel solar.

SIÑA KONOSÉ BO HISTORIA I KULTURA

Kumpliando ku petishon, Fundashon Históriko Boneriano (FuHiKuBo) su kursonan di historia i kultura ta bai sigui djaluna awor.



Dianan i orario:

Djaluna 24 di aprel	7'or - 9'or pm	Djamars 2 mei	7'or - 9'or pm
Djárason 26 di aprel	7'or - 9'or pm	Djaweps 4 mei	7'or pa 9'or pm
Djasabra 29 di aprel	2'or- 5'or pm	Djasabra 6 mei	2'or pa 5'or pm

Por yama inskribí na telefòn 717-8482 (Extra) durante orario di ofisina òf na selular 786-6818 pa mas informashon.
Último dia pa inskribí ta djasabra awor, 22 aprel.
Preis 75\$. Lugánan ta limitá. Dosente ta Bòl Antoin.



Direktor Fedde Pronk di The Green World Company riba e tereno.



The most complete payroll and HR software in the Caribbean!

Payroll Pro

HRM

www.payrollprohrm.com



Download the mobile app!

GET IT ON Google Play | Download on the App Store

Outo ta resultá den kurá di kas

KRALENDIJK – Djá-mars alrededor 7'or di mainta Sentral di Polis a keda notifiká di un aksidente ku a tuma lugá riba Kaya Mgr. Niewindt, den e barío di Tera Kòrá. Na yegada di patrúya na e sitio, a bin topa

ku un vehíkulo ku a dal den kurá di un kas. Na e sitio shofùr di e vehíkulo a splika ku e tabata direkshon Playa i debí na kaminda muhá, el a pèrdè kontrol riba stùr i bai resultá den kurá di e kas. Personal di ambulans a

presentá na e sitio pa duna e shofùr e promé asistensia, pero no mester a keda transportá pa hospital.

Personal di CRS a presentá na e sitio pa atendé ku e aksidente. (Fuente/foto LIVE99FM)



ARCTIC SUNRISE TA BINI BONEIRU!

E barku legendario di Greenpeace, Arctic Sunrise, lo ta na nort pir di 20 pa 27 di aprel. Tur hende ta bon biní pa un rekorido grátis!

Kiko Greenpeace ta hasi na Boneiru?

Huntu ku habitantenan di Boneiru nos ta trata pa hasi gobièrnu na Den Haag kumpli pa protehá habitantenan di Boneiru i otro lugánan kontra kambio di klima. Nos ta laga hasi investigashon riba e impakto di kambio di klima i nos ta tene un diálogo ku otro. Pero akshon no ta tumando lugá. P'esei nos ta preparando un kaso legal huntú ku habitantenan di Boneiru kontra gobièrnu na Den Haag pa hasi loke ta nesesario i hustu.

NOS TA MIRA BO ABORDO!

Karchi di entrada grátis ta disponibel na diferente lugá na Boneiru. Registrashon na nort pir.

Mas informashon: act.gp/arctic-sunrise-bonaire



DIANAN KU E BARKU TA HABRÍ PA PÚBLIKO:

djasabra 22 di aprel i djaweps 27 di aprel
Rekorido grátis pa tur hende 10:00 - 18:00.

GREENPEACE

Den kuadro Dia di Rei

Remses Rafaela ta guia Famia Real den Afrikaanderwijk

WILLEMSTAD — Remses Rafaela ta guia pareha real den nan bishita den e bario Afrikaanderwijk. Esaki den kuadro di selebrashon di Dia di Rei den e bario. Rafaela ta ko-reógrafo i aparte di su diferente proyekto i obranan ku e a i ta produsí, ta manehá e fundashon Passion & Skillz.

Den su kapasidat komo guia, Rafaela lo duna públiko general oportunidat pa eksperensiá e promé parti di e ruta ku Rei Willem Alexander i Reina Maxima lo kana durante nan bishita na e bario pa Dia di Rei 2023.

Afrikaanderwijk
Afrikaanderwijk ta un

bario ku hopi karakter ku Afrikaandermarkt komo sentro di ambiente. A funda e zona residencial masomenos na 1900, ora a kuminsá ku konstrukshon di haf di Rotterdam. E distrito a haña su nòmber i e nòmbernan di kaya basá riba Suráfrika en general i e lidernan di e Afrikaners durante e di Dos Guera di Boers na 1899 pa 1902.

Durante e bishita di e Pareha Real tin 11 kòmbersashon programá na Afrikaandermarkt i vários otro lugá den e bario. Esaki ta inkluí un bishita na moské, hardin botániko i un paseo pa taksi akuátiko. ku lo hiba e Pareha Real na e sentro di siudat pa kontinuá e di dos ora di nan bishita na Rot-

terdam. Kanal di televishon hulandes, SBS 6 lo kubri e bishita monumental. Esnan Hulanda ku ta interesá por inskribí na www.koningsdaginrotterdam.nl

Aktivitat

Banda di esaki Remses ta guiando diferente empresario ku ta hasi negoshi riba tereno kultural. “Mi ta haña hopi importante pa invertí den nos komunidat i kompartí mi konosementu i sabiduria,” Remses a spika. Despues di hopi petishon Remses su fundashon Passion & Skillz, lo bai tin e zomer aki tres edishon adishonal di ‘Keukengesprekken’ na edifisio di ‘Het Gemaal op Zuid’ den Afrikaanderwijk.

Adishonalmente Rafaela lo hasi un gira kòrtiku ku ‘Topa,’ un otro produkshon kreativo ku ta ilustrá kon baile i músika por konektá diferente hende ku e kultura afro karibense. Tambe Remses ta uni forsa pa algun presentashon ku e

músiko Vernon Chatlein pa su proyekto investigativo titulá ‘Kimina’. Durante ‘Kimina,’ Remses ta baila den e parti titulá ‘Tambú.’ Na mei i kuminsamentu di yüni, Remses lo forma parti di e gira ku Orkesta Filharmoniko di Rotterdam.



Den siman ku a pasa

Parlamento a partisipá na Parlatino

WILLEMSTAD--- Resientemente diferente miembro di parlamento a biaha pa Panama pa partisipá na reunionnan di Parlatino. Ta konosí ku Parlatino ta un parlamento formá pa diferente di e parlamen-tonan den Latino Amérika i Karibe ku tin komo meta pa entre otro atendé temanan ku ta relevante pa e region i e paisnan miembro. Esaki a tuma lugá 13 i 14 di aprel

último.

Na apertura di e enkuentro, tres komishon a trata e tema ‘Igualdat di Género’ di forma konhunto. Durante di e tema miembro di parlamento tabatin e oportunidat di risibí informashon di organisashon manera UN Women i Organon ku ta hasiendo hopi trabou riba e tereno di igualdat di género. Un punto di atenshon durante tratamentu

di e tema aki, ta e enfoke ku Panama a pone riba e tema, dor di instituí un Ministerio di Hende Muhé, ku e promé Minister hende Muhé sra. Juana Herrera Araúz. Durante presentashon diferente tema a bini dilanti ku tin relevansia pa Kòrsou. Entre otro e importansia di diversidat den polítika. Ademas importansia di trata e tópiko di género na nivel di pais, komo desa-

royo di komunidat den tur su aspektonan.

Despues di a trata e tema di igualdat di género, kada komishon a repartí i a sigui pa trata nan respektivo temanan. Komishon di salú a enfoká riba e.o. leinan pa protehá prosesonan neurológiko, e komishon di Energia a trata e.o. e tema

di efisiensia den e ámbito energétiko i Komishon di Igualdat di Género, Famia i Hubentut a trata e.o. e tema di ekidat di produktonan di konsumo. Banda di esaki a disidí ku kada pais lo bai bèk na nan Parlamento i òf Gobièrnu pa posibel aporte. riba e diferente lei modelonan.

Na Fortuna Ariba

Kaso di tiramentu ku herido

WILLEMSTAD-- Djadumingu 16 di aprel den oranan di atardi, sentral di polis a risibí informashon di un kaso di tiramentu ku a tuma lugá na Fortuna Ariba.

Na yegada di e unidat polisial a bin enkontrá ku un hòmer den un outo sintá ku herida di bala prosedente di arma di kandela. Ku ambulans di FKA a transportá e víktima pa sala di emergensia di CMC pa kuido médiko

mas avansá.

For di un investigashon preliminar ku polis a hasi na e sitio a bin sali na kla ku un ratu promé dos hòmer a yega na e sitio i a los algun tiru dirigí riba e víktima.

Na e sitio polis a haña i konfiská algu kashi di bala.

Personal di reshèrshi ta kontinuá ku investigashon den kaso ariba menshoná.



Miembronan di Satudarah detené pa negoshi grandi di droga

ENSCHDEDE – Hustisia parse a bolbe habri e yag-mentu riba e miembronan di e klup di motosaikel Satudarah i eks miembronan di Enschede. Sigur kuater



eks miembro entretantu ta será, RTV Oost ta informá, a base di propio investigashon.

Na fin di 2021 a sentensia miembronan tòp di Satudarah na kastigu largu di prizòn pa guia un organisashon kriminal. Komo ku nan a apelá nan sentensia, nan por a warda e proseso siendo den libertat. Awor un parti di e grupo ta será di nobo.

Siman pasá e media regional ya a informá ku a detené un di e fundadónan i hòmben di promé ora di Satudarah, pa negoshi di

droga na gran eskala. Awor parse ku polis a arestá tambe sigur dos miembro di direktiva i un eks miembro. Ministerio Públiko ta informá e detenshonnan na Omroep Brabant, pero no ke bai den detaye.

Den e investigashon di droga ku e nòmber di kódigo, 26March, tin tambe dos èks miembro di e klup di Eschede será. Ta buskando ainda dos hòmben ku tabata forma parti di e grupo. E investigashon a inisiá aña pasá ougùstùs momentu ku for di un tep a resultá ku e miembronan apesar di un

sentensia resien, a kontinuá ku nan negoshi di droga.

Un parti di e sospechonan ku awor ta detené, a detené nan dia 3 di febrüari despues ku hustisia lunanan largu a lesa ku mensahenan ku tabata manda via Exclui Messenger.

Djaluna a detené un hòmben di Enschede i unu di Overdinkel, ku ta konektá na mesun grupo di hòmben.

Segun hustisia, e hòmbenan tabata atendé ku negoshi di mariwana, pero mesun dia a keda lagá den libertat.

Hóben detené inhustu pa menasa na skol

ZAANDAM – Un hóben di Zaandam no ta sospechoso mas den un kaso di menasa rònt di e skol sekundario Pascal Zuid na Zaandam. E skol VMBO e luna akí a haña menasa online. Den un e-mail na e trahadónan i dosentenan di e skol, un hende a skirbi ku e hasi e alumnonan i dosentenan algu. Tambe tabatin foto i un arma di kandela agregá.

Un dia despues a bira konosí ku polis a detené un hóben di 14 aña. El a keda será un dia, pero for di investigashon hudisial awor a resultá ku e no tin nada di

aber ku e menasa.

Ministerio Públiko ta informá ku a resultá ku e number di telefòn di e hóben sí a hunga un ròl di e menasa, pero ku e tabata víktima di un otro persona. Un otro persona tabata usa e number.

Finalmente a hasi e menasa via e-mail. Debí na e investigashon andando i e edat di e hóben, Ministerio Públiko no ke bisa kiko ta e relashon entre e hóben i e persona ku a usa su number i mail menasante.

Dos otro sospechoso, hòbennan di 14 i 15 aña di Zaandam, entretantu a pre-

sentá na Hues Komisario. Mandamentu di mail menasante ta kastigabel, tambe sí no ehekutá e menasa. E investigashon ta andando

mas aleu.


Despues di e menasa, Pascal Zuid, un otro skol sekundario, den e edifisio den serkania di un skol

básiko, a disidí pa keda será. E alumnonan a haña mas tantu posibel lès online.



Sospechoso di asesinato detené di nobo

DEN HAM – Un hòmben di 54 aña di Den Ham a keda detené di nobo den e kaso di asesinato violento



di Jihad Jafo di Enschede. Djamars polis a informá ku e interrogá e hòmben despues ku informashon nobo a bini dilanti for di e investigashon.

Djadumingu 22 di mei mèrdia di aña pasá, a haña e kurpa sin bida di Jafo di 32 aña den e kanal Almelo-De Haandrik na Bruchterveld.

Ku violensia a terminá su bida. Desde 6 di desèmber 2021 e tabata pèrdí. E víktima probablemente lo tabata organisadó di transporte di droga.

Fiskal a pone un rekom-pensa di 30 mil euro den e kaso pa e tep di oro.

Den e kaso awor tin tres sospechoso formal. Banda

di e hòmben di 54 aña di Den Ham ku awor a detené, tin tambe un hòmben di 46 aña di Twente detené.

Dia 23 di yanüari a detené.

Mas aleu tin un hòmben di 57 aña di Alemania ainda komo sospechoso, pero e ta den libertat. Dia promé di febrüari a detené.

STATIA/SABA/ST. MAARTEN

Enkuentro desishon tumá relashoná ku Rich Kalashh

PHILIPSBURG – Djaluna 17 di aprel, Minister di Hustisia, Anna Richardson, hunto ku hefe di Kuerpo Polisial, Carl John, inspektor en hefe, Benjamin Gout, hefe di asuntunan hudisial, Romona Ismail i

nan konseheronan, a reuni ku e fundashon di desaroyo di karnaval di St. Maarten, SCDF, su presidente Edwardo Radjouki i direktor, Michael Granger.

E enkuentro tabata pidi pa SCDF pa elaborá riba e

desishon ku a tuma pa no laga e artista Rich Kalashh, tambe konosí komo Errich Sigmar Cristo, presentá pa e anochi di hip hop internashonal dia 21 di aprel den lus di invershonnan hasí.

Durante e enkuentro,

SCDF tabata kla i a pidi pa konsiderá e desishon tumá pa laga e artista presentá a base di diskushonnan ku tabatin ku su tim di siguridat na lugá di mitigá ningun suseso negativo.

Hefe di Kuerpo Polisial, Carl John, a mantené ku tin informashon ta bai rònt ku e kuerpo no por divulgá. Mas aleu el a enfatisá ku e risiko i análisis di siguridat kondusí pa e kuerpo i e ofisina di Ministerio Públiko, ta serio sufisiente pa atvertí e minister pa sigui i konseho i desishon tumá.

Minister Richardson a reiterá ku Ministerio di Hustisia ta tuma tur tipo di señal relashoná ku risiko potensial pa e komunidad di St. Maarten na e nivel mas

haltu di seriedat.

SCDF a indiká ku e selebrashon di karnaval aña tras aña ta duna nan e oportunidat pa siña tokante kaminanan den kua nan mester mehorá nan operashon.

Minister Richardson a elogiá e kolaborashon ku SCDF i Kuerpo Polisial a mantené durante e añanan ku a pasa i ta mira dilanti pa kontinuá kolaborá na interes di siguridat di tur residente i bishitante di St. Maarten.

Ku esaki e minister ta informá tur promotor ku e práktika di promové artista pa shou na St. Maarten sin risibí pèrmit nesesario, mester para inmediatamente.



Entrega produkto di higiena femenino na skol

PHILIPSBURG -- Minister Omar Ottley di salubridat públiko, kompañá pa Minister Rudolph Samuel, kordinadó di Teen Times, Rochelayne Richardson-Romey, staf di desaroyo komunitario, famia i asuntunan humanitario, Elba Hanson-Flanders i Elencia Baptiste-Boasman, a entregá produktonan di higiena femenino na dos direktiva di skol.

E entrega ta marka inisio na e kompromiso di e proseso di distribushon di produktonan di higiena femenino na e vários skolnan públiko supsidia.

Na momentu di e entrega, representantenan di direktiva di skol katóliko, manager di skol Edmaira Jacobs i hefe di Departamentu di Edukashon Públiko, Daison Marks, a risibí e produktonan na nòmber di

e respektivo organisashonnan. Kada direktiva di skol ta responsabel pa sigurá ku kada skol ku ta kai bou di nan, risibí e produktonan nesesario.

A bini ku e iniciativa pasobra debí na preokupashonnan di Teen Times riba e asuntu di periodo di pubertat, ku a introdusí anteriormente e aña akí den Parlamento, pa pone atenshon na legalisashon produktonan di periodo i e stigma asosia ku e periodo di pubertat. Periodo di pubertat ta definí komo opstákulo pa haña aksesu na produktonan di menstruashon debí na restriksionnan finansiero.

Respondiendo riba e preokupashon akí, Ministerio di Salubridat Públiko, Desaroyo Sosial i Labor, a base di Minister Ottley, a laga hasi un investigashon

riba e realidat di periodo di pubertat na skolnan na St. Maarten.

Miéntas Minister Ottley tabata warda resultado di e investigashon, el a regla pa

e distribushon di produktonan di higiena femenino pa tur instituto.



Sistema hudicial a crea un precedente serio

A expulsa seis traficante di droga prome cu caso a bin dilanti

ORANJESTAD -- Si man pasa Corte den Prome Instancia a trata un caso di droga contra un grupo di seis persona, pa motibo cu na bispo di cambio di aña 2022, nan a wordo gara pa warda costa ora cu nan tabata transportando 880 kilo di marihuana. Nan a ser deteni den awa internacional y a wordo trece Aruba caminda a bay over na confisca e droga y a detene tur e tripulante di seis persona, como sospechosonan den transporte di droga.

Ta trata aki di tres sospechoso di nacionalidad Venezolano y otro tres mas precedente for di Trinidad & Tobago y nan a wordo deteni dia 30 di December di 2020.

Notabel di e caso aki cu

a wordo trata diahuebs ultimo, ta e hecho cu Corte solamente a haci e formalidad di pasa riba e acusacionnan ya cu ningun di e acusadonan, tabata na Aruba ya cu nan a wordo deporte pa Warda Nos Costa.

Den mesun caso aki a bin dilanti cu Kustwacht durante di 2022, a logra di pone man riba 35 mil kilo di droga ora cu detene diferente boto riba lama grandi, cu ta algo hopi serio y e grupo aki cu a wordo deteni cu 880 kilo di marihuana, tambe ta forma parti di e conteo final di aña pasa cu acumula na 35 mil kilo di droga cu a wordo confisca.

Loke a ser treci dilanti durante tratamiento di e caso aki pa Ministerio Publico, ta cu inicialmente a

mira e boto aki riba radar den awa internacional pero rumbo pa Aruba y esey a pone cu por a actua contra di e grupo aki. Abogado cu a presenta e grupo, cu realidad di e caso ta cu el a wordo asigna pa representa e grupo, a muestra cu e droga no tabata destina pa Aruba pero pa Trinidad y a muestra Hues cu pa tal motibo no por acusa e grupo di importa e droga pa Aruba pero si di transportacion di droga.

Aki en realidad tanto Ministerio Publico como Corte, ta crea un precedente ya cu kico e caso aki ta muestra, esta cu pa transporta droga esey no ta castigabel mas riba lama grandi? Awor tambe a permiti e grupo aki bandona Aruba prome cu nan a wordo cas-

tiga loke por haci caminda pa den futuro e caso aki tambe wordo uza como jurisprudencia na favor di un of otro persona den un caso di droga.

Loke ta un tiki dudoso tambe, ta e hecho cu Corte a condena e trio Venezolano den e caso aki, na un castigo di 12 luna di prizon, di cual 4 luna ta condiciona y nan a ricibi dos aña di prueba pero e trio aki no ta na Aruba mas pero ta di regreso na nan pais. Solamente si nan wordo deteni den futuro ora cu nan pone pia bek aki na Aruba, e decision aki lo dreña na vigor, loke ta muestra improbabil ya cu ta solamente nan por dreña como ilegal, esta scondi ya cu via di canalnan normal di inmigracion, esey no ta

posibel.

Ta surgi e pregunta awor si pa hendenan local cu wordo atrapa cu cantidad di droga asina grandi, kico Corte lo haci den nan cas, of nan tambe lo bin na remarcia pa wordo trata den un forma igual? Cu KIA ta 'overvol' cu presonan ta un hecho pero con cu analisa e caso aki, e ta keda un caso extraño caminda e sistema hudi[ci]al a habri caminda pa cierto situacionnan den futuro cu e lo tin cu carga consecuencia di esakinan. Ta miho cu a seponer e caso for di un principio y no trece esaki den Corte caminda awor oficialmente tin un decision legal di e caso pero manera a bira popular ultimo tempo, un caso contra spiritonan.

Januari- Maart 2023:

306,305 bishitante “stayover” na Aruba

ORANJESTAD -- Den e prome 3 lunanan di 2023, Aruba a ricibi un total di 306,305 bishitante “stayover”, cu ta representa un recuperacion di 104% compara cu 2019, cu ta un crecimiento di 4%. 76.2% di e bishitantenan “stayover” tawata precedente di Estados Unidos y di e bishitantenan aki, 45% a bishita for di e estadonan New York, Massachussets y New Jersey.

Si mira aerolineanan cu a yega Aruba den e prome kwartaal, 23.1% di bishitante pa Aruba a yega cu American Airlines, 22.3% cu Jetblue y 14.3% cu Delta Airlines. Den e prome 3 lunanan di 2023, e estadia averahe di bishitantenan “stayover” pa Aruba for di Norte America tawata 7.5

anochi, compara cu 7.3 anochi na 2019.

E estadia averahe di bishitantenan di Europa tawata 11 anochi, compara cu 11.1 anochi na 2019. E estadia averahe di bishitantenan di Latino America tawata di 7.2 anochi, compara cu 8.3 anochi na 2019. E grupo mas grandi di bishitantenan cu a yega Aruba entre januari y maart, tawata e grupo di 50-69 aña di edad, cu tawata 38.1% di bishitante. y 29.7% di bishitantenan tawata entre 30 y 49 aña di edad.

Den e prome kwartaal aki 36.2% di e bishitante a keda den hotel “High-Rise”, 8.4% a keda den hotel “Low-Rise”, 25.6% a keda den “Timeshare” y 29.9% a keda den otro tipo di acomodacion. Pa 2023

lo sigui uza 4 indicador pa midi turismo. Compara cu 2019, na 2023, ta premira cu cantidad di bishitante lo

recupera 105%, entrada di turismo lo recupera 117%, entrada di cambenan di hotel segun cifranan di

AHATA lo recupera 100%, cantidad di bishitantenan crucero lo recupera entre 90% y 100%.



ARUBA

11 Profesional den educacion a finalisa e estudio ‘Master of Science in Education’

ORANJESTAD -- Cu sosten di Gobierno di Aruba, Wayne State College den colaboracion cu Instituto Pedagogico Arubano (IPA) a cuminsa na januari 2020 cu e prome cohort (Aruba 01) di e estudio Master of Science in Education (MSE): Curriculum & Instruction - Instructional Leadership. Recientemente e prome cohort a finalisa e estudio. E grupo ta consisti di algun maestro y cabsante di diferente scol basico, docente di enseñansa avansa y un experto den

guia di maneho di scol.

Dia 5 di april, e 11 profesionalnan den educacion a completa nan estudio di MSE cu un ‘Capstone Fair’. Nan capstone tabata un exposicion den cua nan a presenta y promove e 5 pilarnan (Action Research, Constructivism, Community, Diversity & Reflection) y conceptonan principal di e estudio.

Tambe nan a splica con nan ta aplica loke nan a siña den nan practica diario y con nan ta beneficia e alumnonan, maestronan,

scol y educacion na Aruba en general. Pa e ocasion aki e Dean di Wayne State College Dr. Nick Shudak, e coordinador di e estudio di Master Dr. Johanna Barnes y un representante di e Higher Learning Commission Dr. Kim Linduska a bishita Aruba. Nan tabata hopi impresiona pa e profesionalismo y entusiasmo di e 11 profesionalnan aki. Minister di Enseñansa y Deporte Endy Croes, a felicita e graduadonan y a enfatisa e importancia di e estudio aki pa educacion na

Aruba.

Directorado di IPA, y e dos facilitadornan Darrelyn Maduro MSc y Roke Hoen MSc, tambe ta orguyoso di e grupo Aruba 01 y ta felicita e grupo completo cu ta; Charmaine Tromp-Madu-

ro, Emilaine Giel, Franklin Richardson, Nadia Maduro, Regina de Kort, Rachel Werleman, Ruzischka Tromp, Tamara Hamlet, Sherissa Tsu, Swinda de Cuba-Arendsz & Zuleika Fernandes Perna-Silva.



Cu asistencia tecnico pa recupera di e pandemia

IMF y Banco Mundial ta keda yuda Aruba

ORANJESTAD -- Durante e biahe pa atende IMF Spring Meetings na Washington DC, Minister Maduro a reuni cu e representantenan di Reino Hulandes na IMF, sr. Paul Hilbers y na Banco Mundial, sr. Koen Davidse. E mandatario a splica con ta bayendo cu Aruba su recuperacion, kico ta e retonan nos dilanti y a indica cu Aruba, mescos cu hopi otro pais, ta buscando fondonan special pa por recupera di e pandemia.

Minister Maduro a splica cu Aruba ta buscando un manera pa por organisa nos

portfolio di debe externo na un miho manera. Sigur pa Aruba cu ta fia placa riba mercado internacional, ta masha importante pa organisa nos debe externo di un manera cu e no ta afecta e capacidad di pago di nos Pais.

Aruba tin un bon ‘track-record’ di pago di su debe y ta conoci riba e mercado pa ta un fiado serio y prudente. Sinembargo pa por a surpasa e pandemia, Aruba a crea 916 milyon florin na debe cu Hulanda cu mester wordo paga bek. Aruba ta buscando opcionnan pa refinancia

e debe aki na un manera cu e no ta afecta e capacidad di pago di nos Pais.

Mirando cu IMF y Banco Mundial tin diferente programa pa yuda Paisnan supera e daño haci pa e pandemia, Minister Maduro a dicidi pa toca e tema di refinanciamiento di Aruba su debe en general y particular e debe cu Hulanda cu e representantenan di Reino Hulandes na IMF y Banco Mundial.

Aruba por conta cu yudansa den forma di Asistencia Tecnico Mester bisa cu Aruba no por conta cu

fondonan special di IMF of Banco Mundial pa yuda den e fase di recuperacion di e pandemia y tampoco pa por refinancia nos debe externo. Motibo ta cu Aruba ta forma parti di Reino Hulandes y como cu Reino Hulandes ta donan di IMF y Banco Mundial, e Paisnan den Reino mes no por conta cu e yudansa for di e fondonan special aki. Locual cu si Aruba por conta riba dje, ta e yudansa den forma di Asistencia Tecnico di IMF y Banco Mundial. Aruba a bin ta haya hopi yudansa tecnico e ultimo

tempo riba tereno fiscal, presupuestario y ta conta cada aña cu e evaluacion economico y financiero di e Article IV Mission di IMF.

E aña aki tambe Banco Mundial lo ta yudando Aruba cu un ‘Expenditure Review,’ den cual asistencia tecnico ta wordo brinda pa repasa e gastonan di gobernacion y duna recomendacion con pa organisa esakinan na un manera mas eficiente y eficaz cu e meta pa reduci gasto di gobernacion.

Fanátiko di alma di Real Madrid

Nan ta yama nan mes, Grupo di Seis. Ta trata di seis fanátiko di alma di Real Madrid, kende nan a hasi nan soño bira realidat i a biaha pa Madrid pa presensia wega di nan ekipo. Durante e bishita, e grupo a bishitá tambe e kampo di treinen di e ekipo i diferente otro evento di nan ekipo preferí.



Kurso empayer Clayson Cicilia tabata un éksito

KRALENDIJK--E kurso di empayer ku Clayson Cicilia a sigui na Republika Dominicana a bai super bon segun Clayson mes a bisa den un entrevista ku nos tabatin kuné e siman aki. E la pasa e kurso ku gran éksito.

E la wordu di trein hopi bon tambe dor di Giovanni Meulens empayer di Aruba.

Meulens a teach Clayson di tal forma ku na momentu ku e la yega pa pasa e kurso, e tabata sa mayoria di e kosnan kaba

di manera ku e la logra pasa e kurso ku gran éksito. Riba nos pregunta Clayson a bisa ku e ta hopi satisfecho kon kurso a bai. E la haña bon preparashon pa e kurso serka Empayer Giovanni Meulens.

E kurso a bai bon i na momentunan aki nan ta sigui pusha pa e logra yega unda e tin ku yega komo empayer sèrtifiká. E ta hopi kontentu pa e forma kon Giovanni Meulens ta yudé den esaki, pa e logra bira un empayer sèrtifiká.

E ta hopi kontentu pa e forma kon empayer Meulens ta yudé den esaki.

Esaki du akuerdo ku Clayson Cicilia den entrevista ku nos tabatin kuné e siman aki. Empayer Meulens ta yudé hopi pa e logra i pa e sigui ku su meta den esaki. Clayson ta hopi satisfecho i kontentu pa e forma kon Empayer Meulens ta yudé den esaki pa e logra yega unda ku e tin ku yega komo empayer. Un danki di kurason e ta manda pa Empayer Giovanni Meulens di Aruba ku ta yudé den esaki.

Esaki du akuerdo ku Clayson Cicilia den entrevista ku nos tabatin kuné e siman aki.

Timnan di dominó tin ku entregá lista hungadó

KRALENDIJK--Di akuerdo ku e informashonnan ku a yega nos redakshon di Sensei George Kroon, esaki di parti di direktiva di Asosashon Dominó Rincon, ta urgi tima afiliá pa entregá lista di hungadó.

Di akuerdo ku e informe, e timnan tin ku entregá lista mas tardá dia

10 di mei 2023.

Direktiva di Asociacion Domino Rincon ta anunsiá na e klupnan miembro ku tin di entregá lista di hungadó, pa hasi esaki mas tardá djârasen 10 Mei pa 8'or anochi.

Klupnan miembro ta: Elite, Geza, Los Amigos, Real Dinamite,

Rincon Starsz, Sparta i Strea di Oro. ADR ta pidi tur dirigente pa kumpli ku esaki relashoná ku e preparashon pa inisio di campeonato 2023.

Despues di 10 Mei no ta tuma inskripshon.

Esaki di akuerdo ku e informashonnan den un komunikado emití e siman aki.

Atlético Flamingo ku klínika U15 i U17 ku dos coach di Merka

KRALENDIJK--Atl. Flamingo ku Klinika di futbol ku dos coach di merka pa su hugadónan U15 i U17. E klínika a kuminsá dia 16 di aprel i ta finalisá dia 21 di aprel 2023. SV Flamingo hubenil ta organisá un siman di kurso pa su timnan di futbol U15 i U17 ku 2 “coach” di Merka.

Esaki pa desaroyo di e hungadónan pa hisa e nivel i kalidat di futbol boneriano, loke ta un punto esensial ku SV Atl. Flamingo ta para p’e. Den kuadro di esaki nan a invitá dos coach for di Merka pa duna e muchanan 1 siman di treinen riba nivel haltu. Ta trata di Alex Pama, Head Coach na Life University i Stephen Mc Ginnis, assistant coach Georgia Gwinnet College.

Alex Pama komo Man-

ager di SC Gambuur-Leeuwaarden a yuda SC Gambuur krese den 5 aña pa un di e klupnan mas respetá den futbol hulandes profesional. Na 2011 e la retirá na SC Gambuur.

Na yanüari 2017 Pama a tuma reto nobo na Life University Programma. E la hasi esaki un cambio mesora i dentro di ménos ku 2 aña a resultá ganadó di Mid South Conference Regular Season Championship. Na 2017 i 2018 su ekipo a yega “halve finale d e Mid-South Conference Regular Season Championship i na 2019 nan a yega final di e torneo Na 2019 e programa tabata pará na di 21 lugá riba lista di NAIA National Coaches Poll.

E ekipo a sali pa e 2 rondé di NAIA final na 2017, 2018 i 2019.

Popularidat ta relativo
P'esei un propio estilo
No solamente pa ta eksitoso
Sino sigur mas valioso

Brò KèS 93.5 FM

pokopoko pero sigur mas i mas hende ta ...



Skuch'è

Telefon/ WhatsApp +599 701 0935

www.radio935bonaire.com

DEPORTE

Treinen di bich vòlibòl ku FKPD

E federashon di vòlibòl boneriano, BOVOBO, a realisá su promé dia di treinen di bich vòlibòl ku klientenan di Fundashon Kuido pa Personanan Desabilitá (FKPD). E treinen ta bou di guia di entrenadó John Kessel. Hopi dushi i bunita pa traha ku e muchanan di FKPD, preparando nan pa weganan di Special Olympis 2023.



Treinen di vòlibòl pa mucha chikitu

E federashon di vòlibòl boneriano, BOVOBO, den koperashon ku entrenadó John Kessel, a tene un treinen di vòlibòl pa muchanan chikitu. Hopi great di mira e muchanan akí. Nan tin hopi talento. Huntu ku Kessel, BOVOBO ta sigui pa dilanti.



Artista di desendensia boneriano Mary Thielman

KRALENDIJK – Mary Thielman, ámténar riba e isla Saba, ta un dama di desendensia boneriano ku ta fasiná pa pintamentu. Siman pasá e tabata na Boneiru den un bishita di trabou pa reuní ku Post & Archief i otro instansianan. El a bishitá tambe, huntu ku su kolega, archivo di

FuHiKuBo pa interkambia tokante vários asuntu relacioná ku wardamentu di dokumento i publikashonnan importante.

Banda di su trabou Mary ta praktiká e arte di pintamentu. E ta un artista outodidáktiko, pues ku a siña su mes. E tin su propio wèpsait yamá Saba Jewel.

“Pakiko hoyá? Pasobra, meskos ku un hoyá, e baranka di Saba a pasa den tempu brutu, pero awor a yega tempu pa e bria kla i luminoso, plamando un vibrashon positivo. Mi ta kapta esaki i ta ekspresá esaki pa medio di mi arte.”

E pinturanan di Mary ta di fèrf di awa, zeta i akrí-

liko. Mary ta konta: “Mi a kuminsá pinta komo mucha na kas serka mi welonan òf na kas di mi mama na Mount Scenery, na unda mi ta kana regularmente i

kapta esenanan bunita den naturalesa.”

Mary Thielman su rais na Boneiru ta den famia Thielman di Antriol Pariba, besindario di Ser'i Sileisi.



3030 YEARS PRIZES

City Shop ta hasi aña y nos lo selebrá na **GRANDI!**

30 AÑA - 30 PREMIO



1. Hasi un kompra di \$50 bai ariba.
2. Scan e kódigo QR aki ku bo telefòn.
3. Yena e formulario.

Bo ta partisipando!

Bishita nos página di Facebook i haña mas informashon tokante e konkurso aki.



1st Prize: A Changan CS15 2023!



City Shop
Smart shopping • Better living

30
ANIVERSARIO

f /CityShopBonaire